

दिनांक 08.11.2025

समय: 18.45 बजे

आकाशवाणी जयपुर-अजमेर  
प्रादेशिक समाचार

- प्रदेश मांय मतदाता सूची री एसआईआर प्रक्रिया रे तैत हाल ताई करीब दो करोड़ गणना फॉर्म बांट्या गयां
- बारां जिला री अंता विधानसभा सीट माथे 11 नवम्बर ने होबा वाळा उपचुनाव खातर चुणाव प्रचार थम्यो-अबे उम्मीदवार घर-घर जा र वोट मांग सकेलां
- प्रदेश मांय चाल रह्या सड़क सुरक्षा अभियान रे तैत बड़ा पैमाना माथे लोगां ने सुरक्षित ड्राईविंग अर यातायात नियमां री पालना कानी उं जागरुक कर्यो जा रह्यो हैं
- राज्य मांय सिळी हवा सूं ठंड रो एहसास बध्यो-कुछेक ठोड़ां माथे सुंवारे अर सिंज्या कोहरा रो असरं

000

प्रदेश मांय मतदाता सूची री एसआईआर प्रक्रिया रे तैत 1 करोड़ 56 लाख सूं बत्ता मतदातावां ने गणना फॉर्म बांट्या जा चुक्या हैं मुख्य निर्वाचन अधिकारी नवीन महाजन बताया के 4 नवम्बर सूं सरु व्हीया इण काम मांय काल ताई बीएलओ री कानी उं ये गणना प्रपत्र बांट्या गयां इण मांय बाड़मेर जिलो हाल ताई अव्वल रह्यो वे बताया के गणना प्रपत्र वितरण काम मांय चित्तौड़गढ़ अर अलवर जिला भी आगे रह्यां वठीने 9 जिलां मांय 25 फीसदी सूं भी कम फॉर्म बांट्या गयां श्री महाजन बताया के मतदाता, गणना फार्म ऑन लाइन भी जमा करवा सके हैं चुनाव आयोग री वेबसाईट माथे या सुविधा मुहैया हैं मतदाता केवल खुद रो ऑन लाइन फॉर्म ही भर सके हैं करौली जिला कलेक्टर नीलाभ सक्सेना आज केई मतदान केन्द्रां रो जायजो कर एसआईआर प्रक्रिया री जाणकारी लीं वठीने जालौर मांय बूथ लेवल एजेंट री प्रशिक्षण कार्यशाला भी राखी गई

000

बारां जिला री अंता विधानसभा सीट माथे होबा वाळा उपचुनाव खातर प्रचार आज सिंज्या पूरो व्हीयो प्रचार रा आखिरी दिन आज भाजपा प्रत्याशी मोरपाल सुमन रा समर्थन मांय मुख्यमंत्री भजनलाल शर्मा रोड़ शो कर्यो पैली री मुख्यमंत्री वसुंधरा राजे, सांसद दुष्यंत सिंह अर प्रदेश पार्टी अध्यक्ष मदन राठौड़ भी इण मांय भेळा व्हीयां वठीने कांग्रेस पार्टी रा उम्मीदवार प्रमोद जैन भाया रा प्रचार री कमान प्रदेश अध्यक्ष गोविन्द सिंह डोटासरा संभाळीं पैली रा मंत्री अशोक चांदना भी प्रमोद भाया ने जिताबा खातर लोगां सूं समर्थन मांग्यो निर्दलीय उम्मीदवार नरेश मीणा भी चुनावी रण माथे पूरो दमखम लगाता व्हीया मुकाबला ने रोचक बणा रह्या हैं आरएलपी प्रमुख हनुमान बेनीवाल वां रा जनसम्पर्क मांय लाग रह्या हैं बत्ती जाणकारी म्हांका खबरनवीस सूं -

.....

अंता सीट माथे उपचुनाव खातर 11 नवम्बर ने मतदान व्हेलां वठीने 14 नवम्बर ने वोटों री गिनती रे पाछे नतीजां रो ऐलाण कर्यो जावेलां

000

जीएसटी कटौती सूं ऑटो मोबाइल सेक्टर माथे खासो असर पड़्यो है, हाल ही मांय कर्या गया जीएसटी सुधारों रे पाछे छोटी कारां अर दुपहिया गाड़ियां माथे कर दरां कम व्ही हैं इण सूं वां री कीमत मांय कमी आई है अर बिक्री मांय घणो उछाल आयो हैं बढ़ी व्ही बिक्री सूं ऑटो मोबाइल निर्मातावां रे सागे टायर, बैट्री अर स्टील समेत सहायक उद्योगां ने भी इण रो फायदो पूग्यो हैं जीएसटी दरां मांय कमी री वजह सूं कारां मध्यम वर्ग रा खरीददारां खातर घणी किफायती व्ही हैं पाली निवासी मुकेश राजा हाल ही मांय नुवी गाड़ी खरीदी हैं चौपहिया गाड़ियां माथे टैक्स कम करबा खातर वर्णा सरकार री सरावणा करीं

.....

000

राष्ट्रीय एकता अर स्वदेशी रा संकल्प ने बढ़ावो देबा अर राष्ट्रीय गीत वंदे मातरम् रा 150 बरस पूरा होबा रे मौके प्रदेशभर मांय न्यारा-न्यारा कार्यक्रम कर्या जा रह्या हैं इणी कड़ी मांय बाड़मेर मांय आज प्रभात फेरी अर दुपहिया गाड़ियां री रैली काड़ी गई सागे ही जिला सफाखाना परिसर मांय रक्तदान शिविर राख्यो गयों शहर रा भगवान महावीर टाउन हॉल मांय राखी सांस्कृतिक संध्या मांय स्वतंत्रता सैनानियां अर शहीदां रा घराळा रो सम्मान कर्यो जा रह्यो हैं वठीने बालोतरा मांय भी तिरंगा रैली काड़ी गई

000

भगवान बिरसा मुण्डा री डेढ सौ वीं जयंती रे मौका माथे प्रदेश मांय जनजातीय गौरव पखवाड़ो मनायो जा रह्यो हैं इणी कड़ी मांय सिरौही जिला री झाडोली रा वनधन विकास केन्द्र मांय खास कार्यक्रम राख्यो गयों इण दौरान वनधन उत्पादां री प्रदर्शनी भी लगाई गई राजीविका री इमदाद सूं लगाई गई इण नुमाइश मांय जूट बैग, हर्बल गुलाल, शहद, मोरिंगा पाउडर अर दूजा उत्पाद ध्यान रा केन्द्र रह्यां

000

प्रदेश मांय चाल रह्या सड़क सुरक्षा अभियान रे तैत लोगां मांय सुरक्षित ड्राइविंग अर यातायात नियमां री पालना री कानी ऊं जाग जगाई जा री हैं 4 नवम्बर सूं सरू व्हीयो यो अभियान 18 नवम्बर तांई चालेलां इण दौरान पुलिस, परिवहन अर दूजा महकमा री भेळा मांय मुहिम रे तैत नियमां री अणदेखी करबा वाळा वाहन चालकां माथे कार्रवाई करी जा री हैं भरतपुर सूं म्हांका खबरनवीस बताया के सड़क सुरक्षा अभियान रे तैत परिवहन महकमा री टीम राष्ट्रीय राजमार्गां समेत शहर मांय ठोड़-ठोड़ वाहन चालकां ने रोक र सीट बेल्ट लगाबा अर हैलमेट पहनबा रा फायदा बता रह्या हैं

000

राज्य मांय ठण्डी हवावां चालबा सूं सर्दी रो असर बढ़ रह्यो हैं 10 सूं बत्ता शहरां मांय कम उं कम तापमान 10 डिग्री सेल्सियस सूं नीचे दर्ज कर्यो जा रियो हैं वठीने सीकर रा फतेहपुर मांय आज कम उं कम तापमान 7 डिग्री सेल्सियस रह्यो नागौर मांय 8, दौसा अर बीकानेर रा लूणकरणसर मांय साढे 8 डिग्री सेल्सियस कम उं कम तापमान दर्ज कर्यो गयों सिरौही सूं म्हांका खबरनवीस बताया के लारला तीन-चार दिनां सूं लगातार ठण्डी हवा चालबा रो सिलसिलो बण्यो व्हीयो हैं सुंवारे अर सिंज्या री टेम कोहरा रा असर सूं ठंड और बढ़ रही हैं

000

मौसम केन्द्र, जयपुर रे मुजब आवता दिनां मांय दिन अर रात रा तापमान मांय 2 सूं 3 डिग्री सेल्सियस री गिरावट रा आसार हैं

000

सरहदी जिलो जैसलमेर आं दिनां प्रवासी पक्षियां सूं गुलज़ार हैं अठे रा जलाशयां मांय साइबेरिया, मंगोलिया अर दूजा दूर-दराज रा देशां सूं आया परिन्दा घणी रौनक कर राखी हैं अठे न्यारी-न्यारी नस्लां रा गिद्ध, उल्लू अर केई भांत रा पाणी रा पखेरू कॉमन अर डोमेइसेल क्रैन अर स्पून बिल री अठखेलियां देखी जा सके हैं म्हांका जैसलमेर खबरनवीस रे मुजब आम तौर उं नवम्बर सूं सरू व्ही पंछियां री आवक फरवरी महीना तांई बणी रेहवे हैं

000

देश मांय मानसिक स्वास्थ्य बाबत जाग जगाबा ने बढ़ावो देबा अर लोगां ने टेम माथे इमदाद लेबा रा लगस सूं सरकार री टेली मानस डिजिटल पहल सार्थक साबित व्हे री हैं पेश है समाचार कक्ष सूं डॉ. सालेहा गाजी री रपट -

000

आज राष्ट्रीय विधिक सेवा दिवस हैं जरूरतमंदां ने कानूनी इमदाद अर जाग जगाबा खातर ओ दिन मनायो जावे हैं इणी दिन राष्ट्रीय विधिक सेवा प्राधिकरण अधिनियम 1987 लागू कर्यो गयो हो, जिण वजह सूं कमजोर अर वंचित तबका ने मुफ्त कानूनी सहायता करबा वाळा संगठनां री थापना व्हीं इण

रे जरिये लोक अदालतां राख र राजीनामा सूं मामला रो हल काड्यो जावे हैं विधिक सेवा दिवस रे मौके जैसलमेर मांय जागरुकता शिविर राख्यो गयो

000

बूंदी मांय चाल रह्या तीन दिन रा उत्सव रे दूजे दिन आज नवल सागर पार्क मांय संगीत संध्या राखी गई वठीने काल नवल सागर झील मांय दीपदान अर गंगा आरती रो कार्यक्रम व्हीयों देशी-विदेशी सैलानी अर स्थानीय लोग बड़ी संख्या मांय इण कार्यक्रम मांय भक्तिभाव सूं भाग लीनां वठीने पर्यटन महकमा अर जिला प्रशासन री कानी उं अलवर मांय 23 नवम्बर सूं मत्स्य उत्सव मनायो जावेलां 4 दिन रा इण आयोजन मांय केई भांत रा सांस्कृतिक कार्यक्रम अर रोचक मुकाबल व्हेलां

000